

## 1241-1241- OFP - Acta Capitulorum Generalium Parisius Celebrati

In nomine patris et filii et spiritus sancti. Amen.

Acta capituli generalis Parisius celebrati

anno Domini · M° · CC° · XLI° .

Confirmamus hanc constitutionem. quod non habeamus nisi unam campanam ad omnes horas. et hoc ponatur in fine capituli de officio ecclesie. Et hec habet · iii · capitula.

Item hanc. ut · iiior · provincie scilicet Polonia. Dacia. Iherosolimitana. Grecia aliis provinciis in omnibus adequatentur tam in duobus electoribus magistri ordinis quam in habenda potestate. quam habent priores provinciales. magistro ordinis mortuo vel amoto. Ubi cumque ergo in constitutionibus fit mencio de octo provinciis. ponatur · xii · Et hec habet · iii · capitula.

Item. Quod hec correctio. et ordinacio. et addicio constitutionum nostrarum ab omnibus universaliter observetur. Et hec habet · iii · capitula.

Item. Confirmamus hanc. quod fratres nostri ad Laudate omnes gentes. sedeant sicut prius.

Item. Fratres nostri layci quingenta pater noster dicant.

Item. Illud. Si quis in proclamatione sua iudicium fecerit. ponatur in levi culpa post illud verbum. vindicando clamare presumpserit.

Item. Ubi dicitur de annunciatione mortis magistri. addatur. quod domus Parisiensis annunciet provincie Dacie; Bononiensis vero Polonie. Terre sancte. Grecie. et deleatur illud de constitutionibus. et aliis qui-bus poterit. Et hec habet · ii · capitula.

Item. Ubi dicitur. scripturam publicent in medium. addatur. expressis nominibus eligencium et electorum. Et hec habet · iii · capitula.

Item. Ubi dicitur de diffinitore. vel nisi in priorem provincialem electus fuerit. addatur. et confirmatus. Et hec habet · ii · capitula.

Item. Ubi dicitur in constitutionibus de priore conventuali eligendo secundum formam canonicam a maiori parte eligencium vel per compromissionem vel per communem inspirationem. aliis subtilitatibus iuris relegatis. quod similiter in electione magistri ordinis et priorum provincialium observetur. Et hec habet · ii · capitula.

Item. Quod dicitur in capitulo de gravi culpa. si indumenta vel alia fratri data vel concessa sine ipsius licencia alius acceperit etc. ponatur in titulo de levi culpa post illud. negligenter tractaverit.

Item. Predicatores et eciam alii fratres itinerantes sint contenti officio illorum. ad quos aliquando declinant. residuum removeatur. Et hec habet · iii · capitula.

Item. Frater. qui in aliam provinciam mittitur ad legendum omnes libros suos glosatos. postillas. bibliam. breviarium et quaternos secum deferat. et si simpliciter illi provincie ad quam mittitur assignetur; libri quos habuerit a provincia a qua mittitur. ipso mortuo ad illam provinciam pertinebunt. alii vero omnes sint illius provincie. ad quam mittitur. sive in via sive in provincia moriatur. Si vero ad tempus mittitur. omnes libri ad provinciam. de qua assumptus est; revertantur.

Idem dicimus de missis de provincia ad provinciam non ad regendum. non tamen portent nisi bibliam. breviarium et quaternos. Et hec habet · ii · capitula.

Item. Ubi dicitur. quod socius obediatur predicatori in omnibus. removeatur. in omnibus. Et hec habet · ii · capitula.

Item. Ubi dicitur. predicare non audeat. nisi habeat generale mandatum etc. removeatur. generale. Et hec habet · ii · capitula.

Item. Removeatur. de Cisterciensibus non recipiendis absque speciali licencia domini pape. Et hec habet · iii · capitula.

Approbamus has constitutiones. generale statutum ordinis vel consuetudinem diu optentam et communi-ter in ordine approbatam. nec magister ordinis nec priores provinciales aliquatenus valeant inmutare. nisi per tria capitula generalia fuerit approbatum. Et hec habet · ii · capitula.

Item. Approbamus hanc quod solus ebdomadarius capa serica tam in choro quam in processione utatur. Et hec habet · ii · capitula.

Item hanc. diffinitores excessum magistri ordinis seorsum corrigant et emendent. quod si prevaricator ordinis fuerit aut contemptor aut adeo negligens ei remissus. quod ordinis dissolutionem inducat. moneatur a diffinitoribus. ut magisterio cedat et locum ad manendum sibi eligat. alioquin amovendi ipsum ab officio liberam habeant protestatem. et alia forma removeatur. Et hec habet · ii · capitula.

Inchoamus hanc addicionem. quod cessio eius non admittatur a diffinitoribus nisi propter aliquid premissorum aut propter defectum vel impotenciam. que ipsum ab execuzione officii magistratus perpetuo impediret. Et hec precipimus firmiter observari. Et hec habet · i · capitulum.

Item. Inchoamus hanc. quod in constitutionibus ubi dicitur. mortuo priore. etc. donec prior eiusdem provincie sit electus et confirmatus. addatur. et ipse vel ille cui vices eius (!) commiserit presens in provincia fuerit.

Item. Inchoamus hanc in constitutionibus ubi dicitur. de suppriore et in aliis quantum ei assignaverit. vel permiserit. addatur. Idem autem supprior mortuo priore vel amoto. vices eius in omnibus plenarie optineat. quoisque prior electus et confirmatus in domo presens extiterit. vel prior provincialis aliter ordinaverit.

Item. Inchoamus hanc. quod in constitutionibus ubi dicitur. capitulum generale uno anno Parisius alio anno Bononie celebretur. addatur. nisi magistro et diffinitoribus ex causa legitima quandoque aliud videatur.

Item. Inchoamus hanc. quod in provincia. ubi capitulum generale celebratur ad illud capitulum non veniant nisi diffinitor et socius eius sicut de aliis provinciis. Sed alio tempore capitulum provinciale eiusdem provincie celebretur. et deleatur ista constitucio. statuimus insuper quod omnes priores conventuales. etc.

Admonemus quod fratres accusaciones non mittant ad capitulum litteris apertis. sed clausis.

Item. Quod fratres nostri horas beate virginis calciati incipient.

Pro rege Francie et matre et uxore quilibet frater missam de sancto spiritu. et in morte fiat pro eo sicut pro magistro ordinis per totum ordinem.